

**REGIONAL NEWS UNIT  
ALL INDIA RADIO, AGARTALA  
Date:21-07-2024  
Time: 07.35-07.40 AM Hrs  
BENGALI MORNING BULLETIN**

---

**Students Entry :**

মুখ্যমন্ত্রী অধ্যাপক ডাঃ মানিক সাহা জানিয়েছেন বাংলাদেশ থেকে আগত ছাত্রছাত্রীদের খাদ্য ও বাসস্থানের যথোপযুক্ত ব্যবস্থা করেছে রাজ্য সরকার। উল্লেখ্য গতকাল বাংলাদেশে সহিংস বিক্ষোভের পরিপ্রেক্ষিতে বহু শিক্ষার্থী বাংলাদেশ থেকে ফিরে এসেছে। আগরতলা আই সি পি-র ম্যানেজার দেবাশিস নন্দী জানিয়েছেন গতকাল আগরতলা-আখাউড়া চেকপোস্ট অর্থাৎ আগরতলা আই সি পি দিয়ে বাংলাদেশ থেকে ৫৯ জন ভারতীয় ও নেপালের ছাত্রছাত্রী ভারতে এসেছে। আগত ছাত্রছাত্রীরা আসাম, পশ্চিমবঙ্গ, বিহার, হরিয়ানা, জম্মু কাশ্মীর রাজ্যের ও দুজন নেপালের নাগরিক। তাছাড়া গতকাল সোনামুড়ার শ্রীমন্তপুর আন্তর্জাতিক স্থলবন্দর দিয়ে ২৯৫ জন ছাত্রছাত্রী ভারতে প্রবেশ করেছেন। তাদের সুবিধার্থে সন্ধ্যা সাড়ে ৫ টার বদলে রাত প্রায় ৯ টা পর্যন্ত খোলা ছিল স্থলবন্দরটি। আকাশবাণীর সিপাহীজলা জেলা প্রতিনিধি অভিজিৎ বর্ধনকে রাতে এই সংবাদ জানিয়েছেন শ্রীমন্তপুর স্থলবন্দরের ইমেগ্রেশন অফিসার বিশ্বজিৎ ঘোষ।

\*\*\*\*\*

**World Heritage Commitee :**

প্রধানমন্ত্রী নরেন্দ্র মোদি আজ নয়াদিল্লির ভারত মণ্ডপমে ওয়ার্ল্ড হেরিটেজ কমিটির ১১ দিনব্যাপী ৪৬তম অধিবেশনের উদ্বোধন

করবেন। চলবে ৩১ জুলাই পর্যন্ত। অনুষ্ঠানে ইউনেস্কোর ডিরেক্টর জেনারেল ম্যাডাম অড্রে আজুলে এবং ইউনেস্কো ওয়ার্ল্ড হেরিটেজ সেক্রেটারিয়েটের উর্ধ্বতন কর্মকর্তারা এবং বিভিন্ন দেশের সংস্কৃতি মন্ত্রী, সহ উচ্চ-পর্যায়ের বিশিষ্ট ব্যক্তির উপস্থিতি থাকবেন। উল্লেখ্য ভারত প্রথমবারের মতো এই অনুষ্ঠানের আয়োজন করতে চলেছে।

\*\*\*\*\*

#### **All Party Meeting :**

সংসদের বাজেট অধিবেশন উপলক্ষে সরকার আজ সর্বদলীয় বৈঠক ডেকেছে। বৈঠকে সংসদের উভয় কক্ষের কার্যক্রম সুষ্ঠুভাবে পরিচালনার জন্য সরকার সব রাজনৈতিক দলের সহযোগিতা চাইবে। আকাশবাণী সংবাদদাতা জানাচ্ছেন যে সংসদের বাজেট অধিবেশন আগামী সোমবার শুরু হবে এবং মঙ্গলবার অর্থমন্ত্রী নির্মলা সীতারামন লোকসভায় ২০২৪-২৫ সালের কেন্দ্রীয় বাজেট পেশ করবেন।

এটি হবে নরেন্দ্র মোদী সরকারের তৃতীয় মেয়াদে প্রথম বাজেট। এই বাজেট অধিবেশনে সরকার ছয়টি নতুন বিল আনতে পারে।

\*\*\*\*\*

#### **Nipun Tripura :**

জাতীয় শিক্ষানীতি ২০২০-র চতুর্থ বর্ষপূর্তি উদযাপন উপলক্ষে আগামীকাল থেকে ২৮শে জুলাই পর্যন্ত রাজ্যের সমস্ত বিদ্যালয়গুলোতে পালন করা হবে 'শিক্ষা সপ্তাহ'। ২৮শে জুলাই আয়োজিত হবে শিক্ষক-অভিভাবক সম্মেলন। তাছাড়া বুনিয়াদী শিক্ষা দপ্তরের নিপুন ত্রিপুরা শাখার উদ্যোগে আগামী ২৩ জুলাই

থেকে সারা রাজ্যে শুরু হচ্ছে এন্ডলাইন এসেসমেন্ট সার্ভে। তা চলবে ২৬শে জুলাই পর্যন্ত। উল্লেখ্য প্রায় ৪৭,০০০ ছাত্রছাত্রী নিয়ে সারা দেশের মধ্যে ত্রিপুরাতেই এই প্রথম এধরনের সার্ভে করা হচ্ছে। এই সার্ভের জন্য ইতিমধ্যে প্রায় ১৩,০০০ শিক্ষক-শিক্ষিকা ও পর্যবেক্ষকদের সার্ভের কাজে নিয়োজিত করা হয়েছে এবং তাদেরকে উপযুক্ত প্রশিক্ষণও প্রদান করা হয়েছে।

\*\*\*\*\*

**Governor :**

রাজ্যপাল ইন্দ্রসেনা রেড্ডি নাল্লু আজ মেলাঘরস্থিত ভিরাম্মা কালী মন্দিরের নবম বার্ষিক অনুষ্ঠানের উদ্বোধন করবেন। তাছাড়া সন্ধ্যায় রাজ্যপাল শ্রী নাল্লু আগরতলার নজরুল কলাক্ষেত্রে সংস্কার ভারতী ত্রিপুরা প্রান্তের উদ্যোগে আয়োজিত গুরু পূর্ণিমা উপলক্ষে অনুষ্ঠানে উপস্থিত থাকবেন।

\*\*\*\*\*

**NEET-UG :**

ন্যাশনাল টেস্টিং এজেন্সি, NTA সুপ্রিমকোর্টের নির্দেশে মেডিকেল এন্ট্রান্স পরীক্ষা, NEET-UG-র কেন্দ্রভিত্তিক ফলাফল আপলোড করেছে। শীর্ষ আদালত এনটিএ-কে গতকাল দুপুর ১২টার মধ্যে প্রার্থীদের পরিচয় গোপন রেখে ওয়েবসাইটে শহর-ভিত্তিক এবং কেন্দ্র-ভিত্তিক ফলাফল প্রকাশ করার নির্দেশ দিয়েছিল। এই ফলাফল [neet.ntaonline.in](http://neet.ntaonline.in)-এ দেখা যাবে।

এদিকে, রাঁচির রাজেন্দ্র ইনস্টিটিউট অফ মেডিক্যাল সায়েন্স, RIMS কর্তৃপক্ষ দ্বিতীয় বর্ষের এমবিবিএস ছাত্রী সুরভী কুমারীকে

NEET-UG প্রবেশিকা পরীক্ষার প্রশ্ন ফাঁসের মামলায় জড়িত থাকার অভিযোগে বরখাস্ত করেছে।

একটি পৃথক ঘটনায়, সিবিআই গতকাল NEET-UG প্রশ্ন ফাঁস মামলায় আরও তিনজনকে গ্রেপ্তার করেছে। এদের মধ্যে দুজন রাজস্থানের ভরতপুর মেডিকেল কলেজের ছাত্র।

\*\*\*\*\*

#### **BJP Meeting :**

রাজ্যের ত্রিস্তর পঞ্চায়েত নির্বাচনকে সামনে রেখে গতকাল প্রদেশবিজেপি কার্যালয়ে ত্রিস্তর পঞ্চায়েত নির্বাচনের পরিচালন কমিটির সাংগঠনিক বৈঠক অনুষ্ঠিত হয়। উপস্থিত ছিলেন প্রদেশ বিজেপি সভাপতি রাজীব ভট্টাচার্য, দলের সাধারণ সম্পাদক অমিত রক্ষিত, অর্থমন্ত্রী প্রণজিৎ সিংহ রায়, ক্রীড়া ও যুব বিষয়ক মন্ত্রী টিঙ্কু রায়, প্রাক্তন উপমুখ্যমন্ত্রী যীষু দেববর্মন সহ অন্যান্য কার্যকর্তারা। বৈঠকে পঞ্চায়েত নির্বাচনের জন্য দলের কৌশলগত পরিকল্পনা এবং প্রস্তুতির ব্যাপারে আলোচনা করা হয়েছে। পাশাপাশি দলের সাংগঠনিক পরি কাঠামোকে শক্তিশালী করার উপর বৈঠকে জোর দেওয়া হয়েছে।

\*\*\*\*\*

#### **Kharchi :**

সাতদিনব্যাপী রাজ্যের ঐতিহ্যবাহী খার্চি পূজা ও উৎসব গতকাল শেষ হয়েছে। শেষ দিনে পুরাতন হাভেলির চতুর্দশ দেবতা মন্দির প্রাঙ্গণে কৃষ্ণমালা মুক্ত মঞ্চ সমাপ্তি অনুষ্ঠানের আয়োজন করা হয়। অনুষ্ঠানে প্রধান অতিথি হিসেবে উপস্থিত ছিলেন বিদ্যুৎ মন্ত্রী রতনলাল নাথ, খার্চি উৎসব কমিটির চেয়ারম্যান তথা বিধায়ক

রতন চক্রবর্তী, পুরাতন আগরতলা পঞ্চায়েত সমিতির চেয়ারপারসন বিশ্বজিৎ শীল। অনুষ্ঠানে বক্তব্য রাখতে গিয়ে মন্ত্রী রতনলাল নাথ বলেন ত্রিপুরা সংস্কৃতির পীঠস্থান। রাজ্যের এই ঐতিহ্যবাহী খাচী মেলা জাতি উপজাতি সকল অংশের মানুষের মিলনক্ষেত্র। অনুষ্ঠানে বসে আঁকো প্রতিযোগিতার বিজয়ীদের মধ্যে পুরস্কার বিতরণ করা হয়। উল্লেখ্য ১৪ জুলাই মুখ্যমন্ত্রী প্রফেসর ডক্টর মানিক সাহা সাত দিন ব্যাপী এই উৎসব ও প্রদর্শনীর সূচনা করেন।

\*\*\*\*\*

#### **Amarnath Yatra :**

সুষ্ঠু ও নির্বিঘ্নেই চলছে বার্ষিক অমরনাথ যাত্রা। গতকাল অমরনাথের পবিত্র গুহা মন্দিরের উদ্দেশ্যে রওনা হয়েছে তীর্থযাত্রীদের আরও একটি দল। ৩ হাজার ৪৭১ জন পুণ্যার্থীর ২৩তম দলটি অমরনাথ দর্শনের উদ্দেশ্যে জম্মুর ভগবতী নগর যাত্রী নিবাস থেকে রওনা হয়েছে। কড়া নিরাপত্তা বেষ্টনীতে ১১৪টি গাড়িতে চেপে পুণ্যার্থীরা রওনা হন।

\*\*\*\*\*

#### **Champion Kingshook :**

আন্তর্জাতিক দাবা দিবস উপলক্ষ্যে র্যাপিড দাবা প্রতিযোগিতায় কিংশুক দেবনাথ চ্যাম্পিয়ন হয়েছেন। গতকাল এন এস আর সি সি-র দাবা হলঘরে একদিনের এই আসর হয়। এতে অংশ নিয়েছিলো ৫৯ জন দাবাড়ু। আসরে পরের ৪টি স্থান দখল করে শাক্য সিনহা মোদক, দেবাংকর ব্যানার্জি, উমাশঙ্কর দত্ত এবং

আয়ুষ্ সাহা। প্রতিযোগিতার শেষে বিজয়ীদের পুরস্কার প্রদান করা  
হয়।

\*\*\*\*\*

**Weather :**

আবহাওয়া দপ্তর সূত্রে জানা গেছে আজ আকাশ সাধারণত মেঘাচ্ছন্ন থাকবে। ভোরের সর্বনিম্ন তাপমাত্রা ছিল ২৭ ডিগ্রি সেলসিয়াস। দিনের সর্বোচ্চ তাপমাত্রা থাকবে ৩৫ ডিগ্রি সেলসিয়াস এর কাছাকাছি। ভোর সাড়ে পাঁচটা পর্যন্ত বৃষ্টি হয়েছে ১ দশমিক ৬ মিলিমিটার। রাজ্যের কিছু কিছু জেলায় বজ্রবিদ্যুৎ সহ বৃষ্টির সম্ভাবনা রয়েছে বলে আবহাওয়া দপ্তর জানিয়েছে।

\*\*\*\*\*